

續
文
獻
通
考

續文獻通考卷之四十九

皇明進士雲間王圻纂輯

選舉考 任子 童科

任子

宋

寧宗嘉定十四年夏四月命任子兼試於御史臺 時薛
極以父蔭補上元主簿 十五年二月罷御史臺兼試
任子法

理宗寶慶元年詔胄試仍舊制職事官牒同居五服內親
贅務官牒同居小功親銓次三人取一從李知孝請也
紹定六年詔史彌遠二子宅之宇之並賜同進士出

身尋以宅之爲太府少卿兼崇政殿說書宇之爲將作少監 端平元年詔省吏官至朝奉中散中奉大夫者存歿任子不許過二三人密院比類一體施行令有司裁抑參著爲令從臣僚請也 淳祐二年勅令臣寮世賞不許奏異姓著爲令 六年以前四川制置使陳隆之殉國於合得延賞外更官其二子 時陸游年十二補蔭登仕郎 七年詔武功郎楊州寧淮軍總制張忠戍守浮山手搏虜酋俱死於水特贈武畧大夫官其子寶祐四年詔開國以來勲臣之裔有能世濟其美不能世濟其祿者所在州軍體訪以聞 開慶元年詔荆湖制置司參謀官王登素懷忠義累著勲勞未及功成

而歿特贈官五等合得致仕恩外更官其一子又以段
元鑑楊禮忠亦可褒各贈節度使致仕恩外更官其一
子景定二年都省言徐霖自改官後實歷十餘年不
曾陳乞磨勘轉官今已致仕合行旌異詔官其一子

遼

太宗天顯二年十二月詔選遙輦氏九帳子弟可任官者
穆宗應曆五年四月命郎君蕭海瓌世爲北府宰相時
蕭護思爲北院樞密使命世預宰相選辭曰臣子孫賢
否未知得一客省使足矣從之

景宗保寧時耶律思溫爲北院樞密使兼北府宰相仍命
世預其選

聖宗統和元年九月皇太后言故于越屋質有輔道功宜錄其子孫遂命其子泮決爲林牙 九年七月詔有没于王事者官其子孫 時耶律諸理伐宋獲其將康保威以功詔世預節度使選又宰相韓德讓貴寵蕭敵魯希旨言德讓宜賜國姓籍橫帳由是世預太醫選子孫入官者衆

韓德讓賜姓名曰耶律德昌後又賜名隆運又賜宅及陪葬地宋史載與太后通故其貴

寵若此

開泰八年十二月詔庶孽雖已爲良不得與世選

興宗重熙十六年二月詔世選官擇有才能者用

道宗清寧二年正月詔二女古部世預宰相節度使之選者免皮室軍 咸雍時耶律那也以父幹死王事九歲加諸衛小將軍爲題里司徒 太康三年二月詔北院

金

樞密使耶律乙辛同母兄大奴同母弟阿思世預北南
面樞密之選其異母諸弟世預夷離堇選

乙辛害皇后太子賊臣也

熙宗天眷中門廕之制凡一品至八品皆不限所廕之人
世宗大定二年二月遣遼陽主簿石抹移迭東京鞠院都
監移刺葛補招奚契丹叛人爲白彥敬紇石烈志寧所
害詔收錄其子 四年五月詔皇家袒免以上親就廕
者依格引試中選者勿令當倖使 五年十月制亡宋
官當廕子孫者並同亡遼官用廕又曰教坊出身人若
任流內職者與文武同用廕自餘有勤勞者賞賜而已
昔正隆時嘗使教坊輩典城牧民朕甚不取又更定冒

廕及取廕官罪賞格 七年五月命司天臺官四品以上官改授文武資者並聽如太醫例廕其制凡正班廕亦正班雜班廕亦雜班 十六年以粘葛韓奴之子詳古爲尚輦局直長姜室爲武器直長韓奴被旨招契冊大石後不知所終至是詢知其死節之詳故錄其後二十年定冒廕罪法 二十九年五月時章宗已即位收錄功臣子孫量才于局分承應 八月初定品官子孫試補令史格

章宗明昌元年十一月以上封事者乞六品官添廕吏部言天眷中八品用廕不限所廕之人貞元中七品用廕方限以數當是時文始于將仕武始于進義以上至七

品儒林忠顯各七階許廕一名至六品承直昭信計九階許廕二人自大定十四年文武官從下各增二階其七品視舊爲九階亦廕一名至五品凡十七階方廕二人其五品至三品並無間越惟六品不用廕乞依舊格五品以上皆廕一名六品廕子孫弟兄二人七品仍舊爲格時又以舊格雖有已子許廕兄弟姪蓋所以崇孝弟也而新格禁之遂聽讓廕 承安五年四月定猛安謀克鬪毆殺人遇赦免死者不許世襲 時又定承廕人試弓箭格 泰和元年正月太府監孫復言門廕太濫乃更定廕叙法頒行之 舊制司天太醫內侍長行雖至四品如非特恩換授文武官資不許用廕以本人

見充承應難使係班故也 二年定制以年老六十以上退與患疾及身故者雖非文武官資擬令係班除存習本業者聽廕一名止一子者則不須習卽廕凡諸色出身文武官一品廕子孫至曾孫及弟兄姪孫六人因門廕則五人二品則子孫至曾孫及弟兄姪五人因門廕則四人三品子孫兄弟姪四人因門廕則三人四品五品三人因門廕則二人六品二人七品一人因門廕則六品七品皆一人舊制門廕惟七品一人餘皆加一人明昌格自五品而上皆增一人凡進納官制正班三品廕四人雜班三人武畧子孫兄弟一人雜班明威一人懷遠以上二人鎮國以上三人司天太醫遷至四品

詔換文武官者廕一人 六年以蒲古烈圖刺完顏十
僧皆死國事官其子 七年九月詔應廕之家旁廕者
候正廕足其正廕者未出官而亡許補廕一人

哀宗正大二年十一月定經兵州縣職官子孫非本貫理
廕及過期不廕等格 五年二月詔書死節子孫于御
屏量材官使之 七年八月賜陝西死事之孤鹽引及
絹仍量才任使

元

世祖中統二年九月邢州安撫使張耕告老詔以其子鵬
翼代之 三年十二月詔諸路管民總管子弟有分管
州府司縣及鷹坊人匠諸色事務者罷之 至元四年

詔諸路官品正從分等職官用廢各止一名 諸廢官
不以居官去任身故致仕其承廢之人年及二十五以
上者聽 諸用廢者以嫡長子若嫡長子有廢疾立嫡
長子之子孫曾玄同如無立嫡長子同母弟曾玄同如
無立繼室所生如無立次室所生如無立婢子如絕嗣
傍廢其親兄弟各及子孫如無則傍廢伯叔及其子孫
諸用廢者孫降子曾孫降孫婢生子及傍廢者皆于
合叙品從降一等 諸廢子入品職循其資考流轉陞
遷廉慎幹濟者依格超陞特恩擢用不拘此例其有不
務廉慎違犯禮法者依格降罰重者除名 諸自九品
依例遷至正二品止於未等流轉二品以上選自特旨

諸職官廕子之後若有餘子不得於諸官府自求職
事諸官府亦不許任用 七年四月勅諸路達魯花赤
子弟廕叙充散府諸州達魯花赤其散府諸州子弟充
諸縣達魯花赤諸縣子弟充巡檢 十五年詔軍官有
功而陞職者舊以其子弟襲職陣亡者計令承襲若罷
去者以有功者代之 十七年詔渡江總把百戶有功
陞遷者總把依千戶降等承襲百戶無遞降職名則從
本等 二月江淮行省左丞夏貴請老從之仍官其子
孫 又許衡致仕官其子師可爲懷孟路總管以便侍
養 十九年奉擬萬戶千戶百戶物故視其子孫堪承
襲者依例承襲外都元帥招討使總管總把視其子孫

堪承襲者止令管其元軍元帥招討子孫爲萬戶總管子孫爲千戶總把子孫爲百戶給元佩金銀符病故者降等惟陣亡者本等承襲二十三年正月呂文煥以江淮行省右丞告老許之任其子爲宣慰使二十四年詔諸求襲其父兄之職者宜察其人而用之凡舊臣勲伐及有戰功者其子弟當先任以小職若果有才能則大用之二十五年詔軍官陣亡者本等承襲病故者降二等雖陣亡其子弟無能勿用雖病亡其子弟果能不必降等於本等用之二十七年詔凡軍民官陣亡軍官襲父職民官陣亡者其子比父職降二等叙其孫若弟復降一等三十年詔萬戶千戶百戶分上中

下三等定立條格通行選轉以三年爲滿理筭資考陞
加品級若年老病故者令其子弟依例廕叙

成宗大德四年省議諸職官子孫廕叙正一品子正五品
叙從一品子從五品叙正二品子正六品叙從二品子
從六品叙正三品子正七品叙從三品子從七品叙正
四品子正八品叙從四品子從八品叙正五品子正九
品叙從五品子從九品叙正六品流官於巡檢內用雜
職於省劄錢穀官內用從六品子近上錢穀官正七品
子近中錢穀官從七品子近下錢穀官 諸色目人比
漢人優 等廕叙達魯花赤子孫與民官子孫一體廕
叙傍廕照例降叙 是年以上都虎賁司并武衛內萬

戶千戶百戶達魯花赤亡歿而無奏准承襲定例似爲偏負今後各翼達魯花赤亡歿宜察其子弟有能者用之無能則止十年詔色目鎮撫已歿其子有能依例用之子幼則取其兄弟之子有能者用之俟其子長卽以職還之

武宗至大二年議各衛翼首領官至經歷以上不得陞除似與官軍一體其子孫乃不得承襲今後年踰七十而散官至正四品者宜正從五品軍官內任用四年詔職官子孫承廕須試一經一史能通大義者免保使不通者發還習學蒙古色目試者聽仍舊進階是年詔軍官有故令其嫡長子繼嫡長子亡歿令嫡長孫爲

之嫡長孫亡歿則令嫡長孫之嫡長子爲之若嫡長俱無則以其兄弟之子相應者爲之

仁宗延祐六年部呈福建兩廣海北海南左右兩江雲南四川甘肅等處廕叙之人如父祖始仕本處始以本地方叙用據腹裏江南歷仕陞等遷注者其子孫弟姪承廕又注遠方誠可憐憫今將承廕人等量擬叙用福建兩廣八番官員擬江南廕叙海北海南左右兩江官員擬接連廕叙雲南官員擬四川廕叙四川甘肅官員擬陝西廕叙

英宗至治元年三月初罷醫卜工匠任子其藝果精絕者擇用之三年勅醫卜匠官子孫無廕叙能紹其業者

量才錄用

陶安氏曰有虞世賞岐周世祿獨不世官者人賢否殊也逮至周官師氏以禮樂德行掌國子之教然猶考藝進退未嘗悉世其官而必任焉後世廕補法行或曰顯官必公卿子弟爲之以幼習其業熟朝廷臺閣之儀或曰驕驚不通古今無益于民宜明選求賢除任子之令是皆偏見耳及攷漢儀二千石以上得任子弟擇茂庶者補令承其法良而未備今制廕補五品之上受命於朝降自六品省銓掌金穀且第其上中下以歲月爲差至滿始受朝命許典民政蓋治民者爲國之大端理財者經國之要務將俾因仕知學練世故涉艱難以

治其才然後移以治民故不得不自理財始此則古所無也

順帝至正十五年五月勅主兵官若已擢授其舊職宜別授有功者勿復以子孫承襲

皇明

廕叙之例有五其一用廕以嫡長子若嫡長等殘廢則嫡長子孫以逮曾孫玄孫無則嫡長之同母弟以逮曾玄又無繼室及諸室及諸妾所生者旁廕其親兄弟子孫又無旁廕廕伯叔子孫其二用廕者孫降子曾孫降孫旁廕者皆于應叙品第降一級其三正一品官廕其子於正五品用從一品子則從五品用正二品子則

正六品用從二品子則從六品用正三品子則正七品
用從三品子則從七品用正四品子則正八品用從四
品子則從八品用正五品子則正九品用從五品子則
從九品用正從六品子則於未入流上等職內叙用如
行人巡檢司獄司局批驗鐵冶所官之類正從七品子
則於未入流下等職內叙用如遞運所驛丞閘壩官之
類其四凡職官子孫許廕一人年二十五歲以上能
通本經四書大義者叙用其不通者發還習學再試
其五應叙之人係遠方地面各於原籍附近布政司所
屬銓注

凡廕官各具父祖歷仕緣由去任身故歲月并所授

誥勅彩畫宗支指實該承廕名年甲本處官司體勘房
親揭照籍冊別無詐冒及無陰疾過犯等事上司審驗
相同保結申覆令親齋文解赴部

品管子弟入廕事例

古太學之教自天子之子公卿大夫至元士之適子皆
得入 國初文武官一品至七品之子皆得充國子亦
有及于七品之下者蓋古世祿之義也當是時啓教雖
弘而任官不易非強學登科則積分恒至十餘載而後
使之歷事乃授之官即皆中材其儆淬若是之久鮮不
達已其後貢舉諸生即顯盛貴游之家乃不得輒祿宣
德以來時有陳乞惟 上所裁恒必驗其材質試其文

理之可教者而後許之仍令勉學務從科舉出身正統
中有得請入監而屢科不第其齒已長者祭酒以爲言
英宗命入監十年以上准照歷事出身卽科舉中式
者會試下第仍須復監循次歷事出身天順元年禮部
復議在京三品以上官之子奏願入監讀書者務從科
目出身不許歷事 上從其言且曰國學乃育材之地
今後不許濫進自是非三品子孫不得陳請矣成化初
令大臣三品以上子孫許一人送監照監例出身隨又
令官非年久有政聲者不許十八年禮部奏准在京三
品以上官政績顯著者廕一子入監必先試能通經書
大義者乃許弘治以來凡京官三品以上已經考滿已

給誥命者許一子廕叙免考送監惟未及一考弁有過劾退及年遠離流出身者乃不許其廕子子未仕物故許其補廕無子者許廕繼嗣之子若應得廕子恩典而死許其子孫自陳其間亦有有子而願廕其姪者嘉靖十二年十五年以皇子生十八年以立東宮恩詔兩京文職三品以上官未及三年考滿者廕一子入監讀書

國初時品官之子必試其人而後得廕廕必從科舉而後授官近歲以來廕而獲舉復得以其次子補焉或以嫡子之子有補叙至曾玄者胄子雖由古義而賞延之典於是彌隆

宣宗宣德中大理寺卿湯宗子沐故太常寺寺丞孔克準子希經俱乞 恩入監讀書從之

英宗正統二年九月翰林院檢討仍管助教事王仙會子旒始乞 恩得入監讀書惟令科第出身旒行在兵部員外郎俞英子端太醫院醫士王文子謙俱乞 恩得入監至是旒援以爲請 上命行在禮部尚書胡濙試旒文字濙以文理平順奏聞遂許之 十月工部右侍郎張順乞 恩自言其子震素習春秋資質厚重可堪教養行在禮部以聞 上命震入監讀書

憲宗成化二十三年七月吏部右侍郎劉宜德奏其子秉常入監至正德十四年秉常鄉試中式補廕其子甫入

監讀書

孝宗弘治二年六月南京吏部尚書王僉奏言先年兵部尚書余子俊廕其姪宸吏部左侍郎崔恭廕其姪柯都察院左副都御史張瓚廕其姪宸右副都御史孫仁廕其姪玟今臣例當廕子然長子沂叨中進士次子洛年幼學淺惟姪廕膳生澄粗已成材乞送監讀書從之

七年十一月南京工部致仕尚書胡拱辰乞恩以子孟陽入監寄名仍許侍養待終身之日復監肄業從之
十年二月都察院右都御史黃紱子桓乞恩補廕從之先是南京刑部尚書周瑄兵部尚書原傑俱有子入監夭歿以其孫周伊原應韶補桓兄祀在歷未及選

用而死比二人例遂得入監

武宗正德九年二月南京吏部右侍郎楊守阯子茂深奏言臣父守阯侍從 皇上於 東宮侍讀比之吏部侍郎張元禎太常寺少卿楊時暢等俱 春宮舊臣先後各蒙廕叙遂 命茂深送監讀書 十四年六月江西廣昌縣知縣張潔奏言刑部尚書何喬新名德可錄乞廕其子承鳳入監讀書從之 十五年六月廕大理寺卿陳恪子應期入監讀書恪未經三年考滿蓋異數也世宗嘉靖二年五月故刑部尚書董方曾孫董世臣援已故侍郎萬理孫萬潔事例奏准送監讀書 四年閏十二月故翰林侍講贈學士劉球玄孫劉弘溥奏稱父璽

祚係劉球曾孫球因直言構禍至弘治十六年伊弟劉
祠陳乞已授通政司經歷司知事先臣父劉祚奏乞再
廕 武宗准送監讀書嘉靖四年父劉祚中順天鄉試
尚未實授 恩廕今查得正德八年 聖旨先由錄廕
後中科目的還許補廕一人入監相應照例補廕奉

旨劉弘溥准補廕送監讀書 七年六月已故刑部右

侍郎楊茂元妻錢氏奏稱伊夫考滿病故例應廕子長
男楊美珩已輸粟入監乞要將次男楊美升承廕已准
送監讀書隨有該聽選監生楊美珩奏稱弟楊美升攬
越承廕節次毆罵及楊美升告稱兄楊美珩勒要銀兩
吞占父遺田產該部奉行巡按御史提問該巡按御史

唐鳳儀隨奏楊美珩楊美弁爭廕俱各行止有碍問革
但廕子乃 朝廷優典似不可缺合無將本官嫡孫起
送補廕從之 三十一年六月已故新建伯王守仁繼
妻張氏奏稱臣夫歷任右副都御史至陞南京兵部尚
書中間歷俸三年有餘累獲邊功彼時軍事倥傯未敢
給由及地方平定觸冒瘴氣隨即病故遺下三歲孤兒
王正億今長成陳乞比例廕子從之 三十三年七月
兵部尚書聶豹以築外城効有勤勞加 太子少傅廕
一子入監讀書自陳本職有親男聶管吉年方二歲見
有臣父嫡長孫男聶棟年一十八歲係永豐縣儒學生
員相應承廕從之

太學特廕事例

太祖洪武以來品官子弟之外間有特廕若湖廣行省叅政吳雲之子徽錄爲國子生以雲死事滇南也 正統己巳北征死難諸臣旣官其長子後皆廕其次子入監成化中給事中林榮行人黃乾亨使滿剌加國沒於水以死王事亦各錄其子後乾亨子如金以廕登第復廕其孫 永樂中兵部尚書陳洽死於交趾至弘治十年其會孫端甫猶得比孔鏞李昂羅通之子之例而受廕焉凡禦敵陣亡則不問其官品外內皆得議廕 正德時裕州同知郁采瑞金知縣萬琛皆以死寇廕子入監然不可盡紀近若雲南左布政使徐樾死那鑑之逆

監生謝志望以帥兵拒倭沒于陣皆廕子入監 內閣
經筵及 儲闈輔導 祖宗以來屢有加廕凡特廕
者今皆曰恩生其各處生員有能擒斬首虜許之入監
則曰功生 正德十二年九月會昌縣報效生員文泮
擒斬大帽山賊首從五人送監叙用 十四年十月贛
州府學歲貢監生周尚文以擒斬賊徒報功 上命免
其坐堂卽與附選廩膳生員林思恩例下歲貢一等仍
送監肄業 嘉靖三十三年四月廣寧中屯衛學優等
生員唐能以斬獲虜首照有司廩膳事例題准入監
廕官位高於父

國朝重科目一途任子多不得大位獨 燕府左長史朱

忠定公復以二品後五品終任子濬爲北京刑部尚書
二品 禮部左侍郎儀文簡公智三品任子銘至 太
子太保兵部尚書一品 翰林院學士呂文愍公原五
品任子憲至南京太常寺卿三品 少詹事劉文恭公
鉉任子榮至太常寺卿掌尚寶司三品 浙江按察司
副使陶公成四品任子魯至廣東右布政使二品 南
京工部右侍郎黃文毅公孔昭任子綰至禮部尚書兼
翰林學士二品 江西按察司副使許忠節公達四品
任子場至錦衣衛指揮使管衛事三品 右副都御史
孫忠烈公遂三品任子堪至都督僉事二品堪任子鈺
至都督同知一品 品秩皆過於所自蓋奇遇也儀銘

累任翰林又以尚書掌府黃綰爲詹事學士咸極清華之選而儀贈官至特進左柱國太師階勛位秩遂冠人臣陶復轉廕子孫至錦衣千戶世襲豈不尤奇哉

廕子至通顯

工部尚書黎公澄廕子叔林至工部右侍郎工部左侍郎陳公孝感廕子常戶部右侍郎督倉場凡十七年少保兵部尚書于肅愍公謙廕子冕至順天府尹少師大學士徐文貞公階廕子璠少師大學士劉公吉廕子銳俱至太常寺卿三品少師大學士嚴嵩廕子世蕃至工部左侍郎加正二品服俸太子太保兵部尚書劉莊襄公天和廕孫守有至左都督太子太傅兵部尚書余

肅敏公子俊廕子都督同知少師吏部尚書楊襄毅公
博廕子俊卿至都督同知俱掌錦衣衛事 北京部
尚書朱公濬子紹祖廕通政司左叅議國子監祭酒宋
公訥子復祖廕國子司業吏部左侍郎兼翰林院學士
曹公鼐子恩廕翰林院編修 文淵閣大學士胡公廣
子種尚書金公忠子達廕俱翰林院檢討達改給事中
至兵科都給事中禮部尚書呂公震子熊侍郎儀公智
子銘銘子泰兵部尚書劉公儒子奎陳公洽子樞吏部
侍郎俞公山子誥廕俱給事中皆非常典

廕子改官例

宣宗宣德中儀侍郎智子銘以廕爲給事中後改翰林檢討

討進修撰再進侍讀金殿學幼孜子達以廕爲檢討後改給事中轉左右至兵科都給事中其改官可謂可矣正德初儀賓郎進入兵部子誥以給事中避言路改檢討與金達事文相及

登 極加恩廕子例

世宗嘉靖元年楊太師廷和蔣少傅冕毛少保紀以辭伯爵費少保宏以辭廕錦衣指揮使改廕錦衣指揮千戶等官復固辭以兵部尚書彭澤言廕楊公四品在京文職蔣毛五品費七品皆世襲固辭復不許然四公迄無拜 二年太監趙山死以從龍功廕其卷子雲爲錦衣指揮太監楊璉丘清死復援山例廕養子楊倫丘麒南

京守備戴義死復廕其從子戴錦戴俊太監張欽請廕
養子李賢上以爲錦衣世襲指揮本兵彭澤及科臣
夏言許復禮安磐許相卿爭之不報

穆宗隆慶二年正月吏部奏原任左中允郭希賢以建言
被刑乞廕子有旨郭禹臣准送監讀書

立中宮加恩內閣廕子

今上萬曆六年立中宮王氏加恩輔臣少師張居正
以守制不支祿固辭少保呂調陽進少傅尚書張四維
進太子太保俱廕一子中書舍人至七年居正服闋
進太傅加歲祿百石廕一子尚寶司丞辭太傅六年以
前中宮立無加恩故事蓋異典也

續文獻通考

卷之四十九

十七

四百十先

皇子生推 恩內閣司禮廕子

今上萬曆十年 皇第一子生 恭妃王氏出下 詔赦

天下尊上 仁聖慈聖徽號推 恩 慈聖父武清伯

李偉進封武清侯兄弟都指揮李文全指揮李文貴俱
陞左都督千戶李文松陞指揮使俱給應得 誥命

仁聖父固安伯陳景行歲加祿米一百石廕二子俱錦
衣衛百戶前母 莊皇后兄李鶴歲加祿米十石又

內閣輔臣張四維加少師吏部尚書 中極殿大學士

其 太子太保如故各廕一子尚寶司丞余有丁加

太子太保 文淵閣大學士其尚書如故廕一子中書

舍人俱各給應得 誥命又司禮監馮保廕弟姪都督

僉事張宏廕指揮使孫隆張鯨廕指揮僉事何進李祚
張朝廕正千戶俱錦衣衛

按 皇子生例不推 恩上徽號推 恩止 皇親而
已此異典也

冊立加 恩例

今上萬曆三十年三月以 冊立覃 恩存問大學士申
時行王錫爵王家屏各遣人奏謝奉 旨申承芳王明
虞王湛初俱與做中書舍人

邊功加 恩內閣廕子

武宗正德五年寧夏平加 恩內閣少師 太子太師吏
部尚書 華蓋殿大學士李東陽加特進左柱國仍廕

子尚寶司丞少保 太子太保吏部尚書 武英殿大學士楊廷和加少傅 太子太傅廕子中書舍人吏部尚書 文淵閣大學士劉忠加少傅 太子太傅 武英殿大學士還各賞銀壹百兩紵絲四表裏 太子少保吏部尚書 文淵閣大學士梁儲改 武英殿大學士邊功未有及 內閣者有之自茲歲始 八年以山東河南賊平 內閣大學士李東陽楊廷和梁儲費宏各廕子錦衣世襲正千戶辭乃 詔東陽兼吏部尚書俸廷和加少師 太子太師 華蓋殿大學士諸加少傅 太子太傅 謹身殿大學士宏加 太子太保 武英殿大學士 已上二條蓋內臣欲大有封殖而以是

何閣臣自是與軍功者幾三十年

世宗嘉靖十九年陝西大捷 詔復夏言特進光祿大夫

上柱國少師 太子太師仍兼進吏部尚書 華蓋殿

大學士翟鑾加少保此則夏公以忤 旨鐫秩急欲光

復故也自是不已而議復河套希大封拜得罪死 三

十年獲叛虜哈丹兒等輔臣嚴嵩陞子世蕃工部右侍

郎仍廢一子錦衣衛千戶 東閣大學士李本進禮部

尚書而撰文尚書徐階加少保廢一子入監公朱希忠

加 太子太師都督陸炳加 太子太保尚書孫承恩

加 太子少保此則贊玄例也 三十三年以拒虜功

輔臣嚴嵩廢子尚寶司丞徐階李本廢子中書舍人而

伯陶仲文增祿百石公朱希忠都督陸炳增祿五十石
方承裕 太子太保亦贊玄例也自是復不與邊功將
二十年

穆宗隆慶元年七月少保兼 太子太保吏部尚書楊博
九年秩滿 上遣中官 賜羊酒寶鈔於私第仍 諭
曰博性資忠亮才猷敏達典兵掌銓茂著勞績其加少
傅兼 太子太傅廕一子爲國子生博疏辭至再聽免
廕子餘不允辭 又以遼左功輔臣高拱加柱國 中
極殿大學士張居正加少師兼 太子太師俱廕一子
錦衣衛千戶殷士儋加少保與原輔臣趙貞吉俱廕子
中書舍人 四年冬十二月北虜僭莽執逆賊趙全等

九人來獻總督宣大都御史王崇古以聞 詔全等伏
誅有 旨虜執叛效順內外諸臣運謀宣力功委可嘉
王崇古加 太子少保兵部尚書兼都察院左副都御
史蔭一子錦衣衛正千戶世襲還賞銀五十兩大紅紵
絲蟒衣一襲方逢時陞兵部左侍郎兼右僉都御史蔭
一子錦衣衛百戶世襲賞銀三十兩大紅飛魚紵絲一
襲郭乾加 太子少保蔭一子入監讀書賞銀三十兩
大紅紵絲二表裡谷中虛王遴各陞俸一級賞銀二十
兩一表裡職方郎中李士欽一級賞銀二十兩吳拘等各五兩兵科都
給事中章甫端陞俸一級賞銀十兩其餘的五兩已而
吏部奉 聖諭獻俘禮成 內閣輔臣殫忠運謀勞績

可加茲特加 恩李春芳加吏部尚書俸進 中極殿
大學士餘官如故高拱加少傅兼 建極殿大學士
太子太傅尚書如故各廕一子尚寶司司丞殷士瞻加
少保 武英殿大學士 太子太保尚書如故并原任
大學士趙貞吉俱廕一子中書舍人已而兵部又奉
聖諭司禮監太監陳洪等日侍左右效有勤勞陳洪馮
保加 恩二等廕弟姪一人與做錦衣衛世襲正千戶
曹憲王孫孟冲加 恩一等廕弟姪一人做錦衣衛世
襲百戶

按全等中國人也逃入虜爲鄉導後俺答有孫曰把都
那弟爲我所獲俺答日夜思復其孫乃以全等送還之

遼道回把都那弟云

今上萬曆初年數以遼東戰功輔臣張居正呂調陽張四維加廕賞從厚最後居正遂自太傅進太師子錦衣衛指揮僉事懋修陞同知世襲仍歲加祿米百石張四維加蕪 太子太師廕子錦衣所鎮撫世襲申時行加

太子太保蓋極 恩也 十九年正月初七日吏部文書房傳 旨茲進 累朝訓錄 內閣輔臣效有勤勞

元輔申時行加太師仍廕一子中書舍人次輔王錫爵加少傅王家屏加 太子少保俱各餘官如故各給應得 誥命如 勅奉行 二十二年二月吏部接 聖

諭茲纂修 玉牒書成 內閣輔臣蕪總裁効有勤勞

茲特加 恩元輔王錫爵加少傅兼 太子太保吏部
尚書進 建極殿大學士還厯一子與做中書舍人次
輔趙志臯加少保兼 太子太保戶部尚書張位加大
學士各廕子入監讀書各給應得 誥命如 勅奉行
次日俱奏辭免非常 恩命奉 旨特允 二十四
年二月吏部接出 勅甘鎮大獲奇捷朕心嘉悅 內
閣輔臣殫力運籌忠勲茂著茲特加 恩 太子太保
禮部尚書兼 文淵閣大學士趙志臯加少保改吏部
尚書兼 武英殿大學士還厯一子與做尚寶司司丞
禮部尚書 文淵閣大學士張位加 太子太傅改戶
部尚書大學士如故廕一子中書舍人禮部尚書 東

開大學士陳于陞沈一貫各加太子少保兼文淵閣大學士如故廕一子入監讀書都照新銜給與應得誥命如勅奉行八月吏部奏給由事大學士陳于陞考滿奉旨陳于陞簡任密勿協贊忠誠茲當考滿勞績茂著着便復職加太子太保餘官如故廕一子入監讀書照新銜給與誥命十九年兵部奏寧夏叛逆蕩平奉旨傳諭吏部呼賊據城勾虜叛亂勢甚猖獗該文武將吏運籌效勞勦除克逆平定邊疆朕心嘉悅葉夢熊謀畧素定成功一朝勲庸茂著升都察院右都御史廕一子錦衣衛正千戶世襲賞銀一百兩大紅紵絲四表裡朱正色陞右副都御史廕一子錦衣衛

實授百戶世襲賞銀八十兩彩段四表裡梅國禎陞四品京堂候邊方巡撫推用廕一子錦衣衛實授百戶賞銀五十兩彩段二表裡李如松陞右都督廕一子錦衣衛指揮同知世襲賞銀一百兩大紅紵絲四表裡仍加太子少保以示酬眷蕭如薰陞署都督同知廕一子錦衣衛指揮僉事世襲賞銀八十兩大紅紵絲四表裡常居敬賞銀四十兩彩段二表裡沈思孝姚繼可等俱加叙錄沈思孝急爲起用麻貴加署都督管事候冲邊大將員缺推用劉承嗣准復副總兵李如樟陞叅將遇缺加副總兵推用楊文陞副總兵仍加實職一級來保陞副總兵仍加署都督僉事吳顯陞叅將王通加實職

二級重一奎准叙用張傑蕭如蘭遇大將員缺推用麻
貴劉承嗣來保李如樟馬孔英楊文李寧等仍各賞銀
四十兩彩段二表裡其餘各賞銀二十兩周國柱陞都
指揮使世襲指揮僉事加副總兵仍賞銀五十兩紵絲
二表裡王英陞指揮世襲石棟陞正千戶世襲仍各賞
銀二十兩魏學導事久功多准復原官致仕石星居中
調度功勞崇懋加太子太保廕一子錦衣衛正千戶
賞銀八十兩大紅紵絲四表裡徐元太趙參魯宋應昌
各賞銀三十兩紵絲二表裡楊俊民賞銀三十兩紵絲
二表裡許弘綱賞銀二十兩遇京堂缺推用其餘效勞
官員陞職賞賚有差該部酌量題請 二十二年正月

吏部覆尚書吳文華奏改廕次男承詔奉 旨准改

吏部奏原任尚書張瀚贈官奉 旨贈 太子太保廕

一子入監讀書 十月兵部奏甘鎮海虜犯邊官軍堵

截戰歿奉 旨謝詔准贈都督僉事另廕一子正千戶

馬載圖贈指揮僉事應繼兒男於祖職上加陞副千戶

各世襲仍於本鎮立祠致祭 二十三年三月兵部覆

御史朱鳳翔本奉 旨于謙有安社稷之功原廕指揮

同知着陞都指揮使改註錦衣衛胡宗憲原廕錦衣衛

副千戶着陞指揮僉事各世襲胡宗憲還與他謚 吏

部覆陝西巡撫呂鳴珂本奉 旨盛訥准贈禮部尚書

還廕一子入監讀書 二十四年四月吏部奏兵部侍

郎邢玠廕子奉 旨邢從言准送監讀書 七月吏部

奏原任大學士高儀廕孫男高嗣文補廕有 旨准廕

閏八月吏部奏覆陝西巡撫賈待問廕子奉 旨賈

同芳准送監讀書 九月吏部奏南京戶部侍郎陳渠

廕子陳肯學刑部侍郎朱鴻謨廕子朱仲鉉奉 旨俱

准送監讀書 十月吏部覆南京刑部謝杰廕子奉

旨謝汝璿准送監讀書 楊一魁加 太子少保廕一

子入監讀書奉 旨河工告成有裨漕務朕心嘉悅合

宜升賞以酬勛 二十七年九月兵部欽奉 聖諭倭

奴七年犯順再危朝鮮藉 廟社鴻休文武協力克收

全捷宜叙慶典這水陸四路功次既已勘明議妥邢玠

續文獻通考

卷之四十九

二十四

溫四百五十四

加 太子太保照舊尚書總督廕一子錦衣衛指揮僉
事世襲賞銀八十兩大紅紵絲蟒衣一襲給與應得
誥命張養蒙廕一子入監讀書賞銀六十兩大紅紵絲
四表裡萬世德升右副都御史照舊經理廕一子入監
讀書賞銀五十兩大紅紵絲三表裡陳璘陞實授都督
同知廕一子本衛指揮僉事世襲賞銀六十兩大紅紵
絲四表裡劉綎陞署都督同知廕一子本衛正千戶世
襲麻貴陞右都督廕一子本衛正千戶世襲仍各賞銀
五十兩大紅紵絲三表裡董一元准復原職賞銀四十
兩紵絲二表裡王士琦梁祖齡董漢儒各陞職二級賞
銀二十兩王士琦梁祖齡還需大用周一子楊恩王修

行各陞休一級賞銀十五兩戴延春等十三員各賞銀
二十兩葉邦榮等十四員各賞銀十二兩楊蕪等一百
十八員各八兩孫堂等一百九十五員各五兩戴延春
以下及祖承訓等俱各准陞授錄用贈卹李舜臣行彼
國從優旌卹胡良璽等十二員各賞銀十兩王應民等
各八兩史銘等各八兩餘依擬自決戰以來蕭大亨久
拙兵樞勞多績著各官共效勞勛皆宜報酬蕭大亨着
復原職尚書如故仍賞銀六十兩大紅紵絲蟒衣一襲
李楨遇缺起用楊俊民贈太子太傅陳渠賞銀六十
兩大紅紵絲四表裡給與應得誥命卿樂廕一子入
監讀書給授助階賞銀八十兩大紅蟒衣一襲兵科都

給事中張輔之着於四品京堂內用賞銀十五兩徐觀
瀾着吏部優錄楊應文陞都給事中與徐觀瀾俱各賞
銀十五兩職方司郎中楊應聘陞京堂用賞銀十五兩
其餘各十兩石星通倭釀患賣國損威曹學程食祿忘

君保身尸位如何擅引魏學會舊例市恩姑且不究
都照舊監候處決許守恩蕭應宮本宜重處姑着發烟
瘴地面永遠充軍遇赦不宥又 諭東事收功各督撫
鎮道共效勞績慶典宜普楮缺等十八員各賞銀三十
兩紵絲二表裡內王世揚陞兵部尚書李順陞右都御
史俱照舊管事汪應蛟梅國楨王象乾劉元霖李植各
陞俸一級尹應元給與應得 誥命韓子瀛等二十三

員各賞銀十二兩王狹吉等八員各八兩其陞職復俸等項俱依擬又諭諭朝鮮之時賴有稷山青山二戰挫賊銳鋒及至蔚山斬馘甚勝雖煩再舉今已收功俱宜叙錄既勘議及併叙明白麻貴免議楊位丁應泰各賞銀十五兩陳登十兩茅國器陳寅彭友德各十五兩陳遇文等八員各十兩胡仰化五兩各官陞後錄贈提問革職等項悉俱依擬楊鎬係聽勘官今科臣既已勘明功罪自不相掩着吏部從公議處來說又諭楊鎬用兵雖有損失但王京垂亡之時能單騎赴敵力戰存國功亦難泯既公論已定准以原官叙用又諭東倭蕩平大獲奇捷內閣輔臣運籌帷幄勞績可嘉茲特加

恩示酬元輔志臯加兼 太子太師進 中極殿大
學士廕一子與做尚寶司司丞還賞銀八十兩彩段四
表裡次輔一貫加少保改吏部尚書廕一子與做中書
舍人還賞銀七十兩彩段四表裡各餘官如故都照新
銜給與應得 誥命如 勅奉行

異途加 恩廕子例

金忠初名世忠鄞縣人精于卜居地名韓嶺洪武中同
邑袁廷玉以相名一日過縣前見一婦人乳女于傍廊
下哭聲淒甚廷玉就詢之婦人告曰夫當戍趙州今在
酒肆旗軍飲畢即行矣言既復哭之悲袁心憐之往見
其夫夫曰我韓嶺金世忠也居以卜課度日今缺戍爲

族人賂旗軍以我代行袁相其面曰此尚書骨法也他日當大貴此行勿憂因代償其酒值又貸米二斗贈之別告之曰登舟即順境他日富貴無相忘既而舟泊西渡其濟者病腹痛金與之卜言宜用衣帶刮咽喉下即愈如其言果瘥驚以爲神因厚謝之以故旅資遂不匱至戊所開卜肆以奇驗聞于燕邸召至問以靖難卜云吉遂署爲紀善侍帷幄用其謀有成後官兵部尚書永樂三年皇太子正位東宮命燕詹事府事尋卒洪熙元年贈少師謚忠襄子達年十歲授檢討還鄉支俸以幼童廕官自此始

蒯祥蘇州人木工也父福能永樂中主大營繕以老告

退祥代之丁酉扈從往北凡 宮殿廟社皆從事 正
統中重作 三殿及文武諸衙門勞尤多 天順末奉
命作 裕陵 成化間自營繕所丞進所副陟營繕
司主事員外郎歷太僕寺少卿晉工部右侍郎轉左食
一品俸成化辛丑三月卒年八十四得 贈及祖父母
廕其子爲錦衣衛千戶又廕國子生

徐杲楊州人亦木工嘉靖末脩玄教屢興改 宮殿杲
多著力極膺榮寵累官至工部尚書又官其子爲錦衣
衛百戶尋奏言願以所積賞銀自豎尚書牌坊許之隆
慶初爲言官論劾籍其家奪官毀坊視祥之祿壽不及
遠矣

駙馬都尉齊孫入監讀書者李琦係楨成化二十三年
送監尹清孫衡弘治十年送監沐昕曾孫居弘治十一
年送監右皆乞恩得旨嗣後兩宮徽號詔赦
內有錄用一條不可勝紀

聖夫人劉氏男季通天順八年送翰林院習字授中
書舍人累陞太僕寺少卿恭聖夫人男胡恭成化二
年送中書習字授中書舍人累陞尚寶司卿

世宗嘉靖甲子命太監黃錦廕弟姪一人錦衣衛百戶
是年秋八月以洪壇大素二殿成工部具奏乞恩
上悅命太監王錫廕弟姪一人太監張琮賈胤各
廕弟姪一人錦衣所鎮撫工部尚書雷禮廕一子入監

讀書 太監王鼎等往視工報完又大慶賞王廕弟姪

一人

穆宗隆慶元年春正月內官監太監李芳以侍 藩府推

恩廕子芳懇辭 上以芳久侍左右著忠勤特茲錄

廕以示酬獎不准辭

補廕事例

世宗嘉靖中補廕原任南京光祿寺卿楊維聰男楊文禕
送國子監讀書維聰子三人次文祈中順天鄉試先是
嘉靖十八年遇 恩例兩京官三品以上俱廕一子維
聰已廕長子文祥送監讀書轉吏部附選至嘉靖二十
四年未仕病故至是 上即位其第三子文禕遂援嘉

靖四十五年五月內有原任兵部尚書趙廷瑞以恩
例廕弟趙廷璋未任病故補廕男趙岳生原任兵部侍
郎張衍慶以恩例廕男張樸未任病故補廕次男張
槩比例陳乞許之

童科

宋譚中立茶陵人應童子科仕至吏部侍郎文章治行爲
時所推重 譚昭實茶陵人五歲能讀五經知爲文辭
七歲應童子科中上第 陸德輿崇德人由童子登科
官至吏部尚書 張伯淳崇德人少舉童子科後舉進
士 胡穎湘潭人幼機警中童子科紹定間登進士第
浙江宋時以神童舉者嘉興自陸德輿張伯淳而外

續文獻通考

卷之四十九

二十九

四百五十四

有徐聞詩台州有余滾傳元英葉斗南陳處益牟松壽
謝斯立詹檜龍楊說孫應獫李仕龍陳棟沈培陳用亨
李志式鄭寅戴顏老何亨復衢州有呂嗣興嚴州有邵
煥温州有薛元禮潘起予嚴觀陳逢吉應節嚴胡芳林
普胡葵項公澤沈燐吳道願元薛元德郭孔疇謝子雲
鄭友禮處州有田介孫田晉孫田仲和季申阜陳嘉猷
潘景俞而鄞縣之汪洙慈谿之姚正子則未及焉 福
建宋時登童子科者乾道三年高應何邁寧德人淳熙
二年何樞寧德人何致遠羅源人七年林公洽長樂人
何擢德安人

金有經童之制凡士庶子年十三以下能誦二大經三小

經又誦論語諸子五千字以上府試十五題通十三以上會試每場十五題三場共通四十一以上爲中選所貴在幼而誦多者若年同則以誦大經多者爲最

太宗天會八年東平童子劉天驥七歲能誦詩書易禮春秋左傳及論語孟子上命教養之

熙宗皇統十五年詔闢童子舉取至百二十二人 海陵

天德時以童子無益詔廢之

世宗大定二十九年 章宗初即位 上謂宰臣曰經童豈遽無人

其議復置

章宗明昌元年益都府申童子劉住兒年十一歲能詩賦誦大小六經所書行草頗有法孝行夙成乞依宋童子

李淑賜出身且加以恩詔上召至內殿試鳳凰來儀賦
魚在藻詩又令賦旱詩上嘉之賜本科出身給錢粟官
舍令肄業太學三年平章政事完顏守貞言經童之
科非古也自唐諸道表薦或取五人至十人近代宋仁
宗以爲無補罷之本朝皇統間取及五十人因以爲常
天德時復廢聖主復置取以百數恐久積多不勝銓擬
乞諭旨約數取之上曰若所誦皆及格何如守貞曰視
最幼而誦不訛者精選之則數亦不多也復問參知政
事胥持國對曰所誦通否易見豈容有濫上曰限以三
十或四十人若百人皆通亦可覆取其精者持國曰是
科蓋資教之術耳夫幼習其文長玩其義使之蒞政人

才出焉如中選者加之修習進士舉業則所記皆得爲用臣謂可勿令遽登仕途必習舉業而後官之可也若能擢進士第自同進士任用如中府薦會試視其次數優其等給幾舉不得薦者從本科出身又可以激勸而後得人矣詔議行之 五年勅神童三次終場同進士恩榜遷轉兩次終場全免差使第六任與縣令依本路遷官如一次終場初入仕則除一差其餘並依本門戶仍使應三舉然後入仕每舉放四十人 明昌後稱神童者五人太原常漆壽四歲能作詩劉滋劉微張漢臣後皆無聞獨易州麻九疇三歲識字七歲能草書作大書後能樹立趙秉文以徵君目之而不名又張元素字

潔古易州人八歲試童子舉

元

成宗大德三年舉童子楊山童海童 五年大都提舉學

校所舉安西路張秦山江浙行省薦舉張昇甫

武宗至大元年舉武福安

仁宗延祐三年江浙行省舉錢傳孫馮帖哥 六年河南

路舉張荅罕學士完者不花舉丁禎禎 七年河間縣

舉杜山童大興縣舉陳聃

英宗至治元年福州路連江縣舉陳元麟 三年河南行

省舉張英

泰定帝泰定四年福州舉葉留畊

文宗天曆二年舉杜夙靈 至順二年制舉谷不及子置
來的

已上皆以其天資穎悟超出見輩或能默誦經文書寫
大字或能綴緝辭章解說經史並令入國學教育之惟
成宗時張泰山尤精篆楷英宗時陳元麟能通性理泰
定時葉蜀畊問以四書大義對曰無過事父母能竭其
力事君能致其身時人以遠大期之 袁遵道豐縣人
年六歲能誦五經以神童薦 安滔九歲以經童登第
陰幼遇奉新人八歲中九經科

皇明

國朝科目不設童科間有以神童薦者 召至親試或留

中講讀或遣歸就舉今具于後

洪鍾錢塘人四歲以善大書舉入翰林肄業後舉進士官舍人

李東陽長沙人五歲以奇童舉 景帝召試大書屬對

喜甚 詔入京府學肄業中天順甲申進士第一官少

師 華蓋殿大學士謚文正

程敏政休寧人程襄敏信長子年八歲隨父大參入蜀

撫臣以神童薦 英宗試 聖節及瑞雪詩并經義各

一篇援筆立就 上大喜 詔讀書翰林院官給廩饌

踰冠舉進士第二官禮部右侍郎

楊一清雲南人寓京口十歲有司以奇童舉登弘治庚

戊第官少師 殿閣學士

董玘浙江會稽人弘治中玘父自舉奇童試不中格令
罷歸十八年登第嘉靖初官吏侍

楊廷和新都人十二歲中舉後官至大學士

任道遜舉奇童侍 東宮書登成化戊戌進士官少師
殿閣學士

朱奎以幼童薦官大理卿直 內閣

林章以幼童薦直 內閣官太常寺卿進階從一品

謝宇以幼童薦直 內閣官工部左侍郎

續文獻通考卷之四十九終

續文獻通考卷之五十

皇明進士雲間王圻纂輯

選舉考 吏道 貲選 方伎

吏道

宋

寧宗嘉定八年詔凡吏毋得減年叅選著爲令 宋韓公
喬以三館吏補官充康王府內知客累官岳陽軍節度
使乾道初卒贈太尉謚恭榮

遼

聖宗統和中耶律八哥以世業爲本部吏未幾陞闡撒絨
尋轉樞密院侍御終西北路都監

金

金制取吏員者有律科又稱諸科亦謂之進士其法以律
令內出題府試十五題每五人取一人其制始見于海
陵正隆元年至世宗大定二十年正月定試令史格二
十二年定制會試每場十五題三場共通三十六條以
上文理優擬斷當用字切者爲中選臨時約取之初無
定數至章宗大定二十九年有司言律科止知讀律不
知教化之源可使通治論語孟子以涵養其氣度遂令
自今舉後復于論語孟子內試小義一道府會試別作
一日引試命經義試官出題與本科通考從之

熙宗皇統八年定右職省令史譯史格考遷一重女直人

依本法外諸人越進義每三十月各遷兩重百二十月
出職除正六品以下正七品以上職官 海陵正隆二
年更爲五十月遷一重初考女直人遷敦武校尉餘人
遷保義校尉百五十月出職係正班與從七品若自樞
密院六部轉省者以前已成考月數通算出職

世宗大定二年復以三十月遷一重亦以百二十月出職
與正從七品院臺六部及他府司轉省而不及考者以
三月折兩月一考與從七品兩考正七品三考與六品
三年定格以七十五月出職者初上令二中令三下
令四五錄事六下令七中令八上令百五十月出職者
初敕同運判州官等二三中令四上令回呈省 二十

七年制一考及不成考者除從七品須歷縣令三任第五任則陞正七品兩考以上除正七品再任降除縣令三四皆與正七品第五任則陞六品三考以上者除六品再任降正七品三任四任與六品第五任則陞從五品金吏員雜選見于右職省者如此其餘各衙門出職者又多不同不具錄

章宗明昌三年改提刑司令史爲書史

宣宗興定二年七月擇才幹官提控銓選無違失者與升擢令譯史不任事者驗已歷俸月放滿別選能者

馬慶詳

以尚書省譯史官至鳳翔路兵馬都總管判官後死節

烏古論奴申

以譯史官行省左右司郎中兼知官省事死節

清察琦以刑部掾官至都統後死節

元

世祖至元十九年省議中書省掾於樞密院御史臺令史內取臺院令史於六部令史內取六部令史以諸路歲貢人吏補充內外職官才堪省掾及院臺部令史者亦許擢用省掾考滿資品既高責任亦重皆自歲貢中出若不教養銓試必致人才失真

時歲貢吏式各路司吏有關於所屬衙門人吏內選取委本路長官參佐同儒學教授考試習行移算術字畫謹嚴語言辯利詩書論孟內通一經者爲中式然後補充按察司書吏有關府州司吏內勾補至歲貢時本州

本路以上再試貢解 諸歲貢吏當該官司於見役人
內公選以性行純謹儒吏無通者爲上才識明敏吏事
熟閑者次之月日雖多才能無取者不許呈貢

二十二年擬呈試吏員先有定立貢法各道按察司上
路總管府凡三年一貢儒吏各一人下路二年貢一人
以次籍記各部令史有關補用若隨路司吏及歲貢儒
人先補按察書吏然後貢之於部按察書吏依先例選
取考試惟以經史吏業不失章指者爲中選隨路貢舉
元額自至元二十三年爲始各道按察司每歲於書吏
內以次貢二名儒人一名必諳吏事吏人一名必知經
史者遇各部令史有關以次勾補

成宗元貞元年詔諸路有儒通吏事吏通經術性行脩謹者各路薦舉廉訪司試選每道歲貢二人省臺委官立法考試必中程式方許錄用 大德二年貢部人吏擬宣慰司廉訪司每道歲貢二人儒吏無通者自大德三年爲始依例歲貢應合轉補各部寺監令史依至元新格發遣到部之日公座試驗收補 九年省判凡選府州教授年四十以下者願試吏員程式許補各部令史除南人已試者別無定奪到部未試之人依例考試之仁宗延祐間下第之士恩例不可舉得間有試補書吏以登仕籍者

英宗至治二年省准各道廉訪司書吏先儒儒人不敷者

吏員內充貢各歷一考依例試貢

文宗天曆元年詔廉訪司書吏當以職官教授吏員鄉貢

進士參用

李思讓

至元間由嘉興路吏貢補浙西按察司書吏廉介有為後仕至憲官

謝文蔚

以縣吏為江南行省掾歷遷行臺監察御史

樊楫

初為軍吏後累官行中書省參知政事

謝讓

初推擇為吏補宣慰司令史後累官侍御史卒贈正奉大夫河南行省參知政事追封陳留郡公謚

憲穆

郭貫

以才行見推擇為樞密中書掾累官參政廉訪司事泰定元年遷翰林學士承旨不起

夏思忠

少嘗為吏後從張士誠款降授思忠江浙行省郎中改杭州路總管

陶安曰唐虞三代之世皋夔稷契伊傳周召渾然全才

爲時輔佐道德勲業標準萬世未嘗有儒與吏之名也
周官謂儒以道得民吏以治得民二者並立然猶相濟
爲用秦不師古棄詩書事刀筆吏始抗儒而反勝焉漢
之時習章句者爲儒攻法律者爲吏判爲兩途宋設經
義治事齋人才之興駸駸逼古吏本于儒也審矣國朝
混一治雖尚吏世祖號稱儒教大宗師若此則崇儒尤
重可知今職簿書佐官府者通謂之吏先朝詔旨若曰
秀才生員願爲吏者俾爲之竊論秀才爲文行英茂者
言生員但廩食于學校者爾然擢吏恒于生員而名秀
才者不得與似非明詔初意此亦吏弊不諳大體之一
也

又曰朝廷以吏術治天下中土之才積功簿書有致位
宰執者時人翕然尚吏雖門第之高華儒流之英雅皆
樂趨焉其由儒入吏者歷四考始登于選部此爲吏之
常調也有一拔陞清要可立致緋紫惟中土之才躋是
者十八九方今天下分道二十有二各設風憲贊憲府
刑政者曰書吏擇其才能以道揚威德去憲官最近

皇明

國初因前代之制令有司設司吏許各保貼書二名其後
定設掾史令史書吏司吏典吏俱視政事繁簡爲額及
政事益繁又設提控都吏令史胥史獄典攢典事簡者
則裁減之三考滿日冠帶回籍省祭銓部照年分捱次

行取各查出身資格選用

凡在外各衙門送到考滿吏典於在京對品衙門內用在京各衙門考滿吏典照依資格陞用無缺借用仍支合俸裁革減併吏對品衙門用借撥者支前役俸農吏罷閒官生員監生承差爲事充吏遇缺撥用各支本等俸其五品以下衙門吏典該與俸米食米者照例支給若罷閒永充截替市井吏遇缺量度撥用止支九品衙門司吏俸一石工滿并爲事斷發吏遇缺撥用月支食米五斗每月通額行移各衙門收役并勾取在逃吏自首行勾日淺未曾撥補准首仍送着役若及日久窺伺撥補避難及已移文原籍勾解者俱送刑部問罪仍發本

部聽用若各衙門退回奸猾託稱不諳吏事舊吏照地方發遣遠充軍爲事還役吏典在京者行移各該衙門收役在外者割付應天府給引轉發着役在京割付應天府

凡在京大小衙門及在外布政司并直隸府州縣吏典各以三年考滿給由其倉攢典以週歲爲滿除稅課司庫局攢典考滿之日隨即交割明白府州縣倉攢典將經收糧斛支銷盡絕方許給由應有府州縣吏典考滿當即給由如布政司府州縣過違一年直隸并在京過違半年給由到部俱送法司取問如不過違者隨付司封照依資格撥用

凡吏役資格 太祖洪武十七年奏定在外二品衙門通

吏考滿於在京從七品出身吏員內陞轉令史於在京
正八品出身吏員內陞轉在外三品衙門令史書吏於
在京正九品出身吏員內陞轉在外三品衙門典吏四
品衙門司吏於在京從九品出身吏員內陞轉察院磨
勘司典吏仍依原定未入流品內出身五品以下衙門
吏人依原定資格陞轉其在京一品二品衙門知印承
差不許於吏員內取用 十九年更定中外諸司吏員
役滿轉補資格在京入流衙門吏員充九品衙門司吏
九品衙門司吏充八品衙門司吏及七品衙門典吏八
品衙門司吏七品衙門典吏充七品衙門書吏及七品
衙門六品衙門典吏七品衙門書吏充五品衙門司吏

胥吏六品衙門典吏充五品衙門典吏及六品衙門司
吏六品衙門司吏五品衙門典吏俱充五品衙門司吏
胥吏四品衙門典吏五品衙門司吏胥吏充四品衙門
司吏及三品衙門典吏四品衙門司吏三品衙門典吏
俱充三品衙門令史及二品衙門典吏三品衙門令史
及二品衙門典吏俱充二品衙門令史及一品衙門典
吏二品衙門令史充一品衙門掾史及對品衙門都吏
充一品衙門提控一品衙門典吏充對品衙門掾史及
對品衙門提控皆以三年爲滿給由赴部錄用在外衙
門若各驛遞運所河泊閘壩等衙門吏攢充七品衙門
典吏七品衙門典吏充五品六品衙門典吏其五品六

品衙門典吏或有俸九品衙門并有俸未入流品衙門
吏充七品衙門司吏六品衙門典吏充六品衙門司吏
五品衙門典吏充六品衙門司吏六品衙門司吏充五
品衙門司吏五品衙門司吏充四品衙門司吏及三品
衙門典吏四品衙門典吏充四品衙門司吏及三品衙
門典吏三品衙門典吏充二品衙門典吏及三品衙門
令史書吏三品衙門令史書吏充二品衙門令史二品
衙門令史充二品衙門通吏已上三年滿日無缺給由
到部於在京衙門內用 三十一年續定吏員出身事
例皆以九年考滿出身或在京兩考在外 考或在京
一考在外兩考一品二品衙門提控都吏從七品出身

掾史令史典吏并 內府門吏正八品出身三品衙門
令史從八品出身典吏及四品衙門司吏正九品出身
四品衙門典吏五品衙門司吏典吏書吏俱從九品出
身六品至九品并雜職衙門史典都察院各道吏典俱
除雜職後俱以在外兩考在京一考爲滿

凡吏典撥歷俱以實俸爲准在外通吏撥在京五府六部
提控都吏如通吏少則以都布二司令史兼撥在外都
布二司令史按察司鹽運司書吏衛令史撥在京五府
六部都察院掾史令史在外府司吏撥在京各衛并順
天府光祿寺通政司太僕寺令史大理寺胥史在外都
布按并各衛府鹽運司典吏撥在京五府六部都察院

典吏并總兵官巡撫都御史典吏在外州所司鎮撫司
長史司吏撥在京各衛并順天府光祿寺通政司大理
寺太僕寺典吏在外縣司州典吏撥在京鴻臚寺翰林
院各千戶所司吏在外縣典吏撥在京十三道書吏典
吏巡按書吏各百戶所司吏戶刑二部都察院順天府
照磨所宛大二縣司典并十庫司攢在外倉攢撥在京
馬房攢典并草場抽分局巡檢司閘壩吏各稅課司攢
典在外巡檢司稅課司攢典在外巡檢司稅典在外巡
檢司稅課司儒學驛閘吏庫攢撥京通二倉守支攢典
其北直隸都司衛所一考役滿吏典本處聽候三月之
上無缺轉叅起送後府轉送到司者撥別處衛所府州

縣起送考退廩膳生員充吏者撥附近府分考功司付到重歷者撥臨近衛所俱附卷其廣東廣西四川三布政司湖廣所屬永州辰州寶慶靖州常德長沙衡州郴州江西所屬南安贛州福建所屬漳州泉州汀州興化及福建行都司所屬建寧左等五衛二十五所并武平等守禦千戶所吏典俱南京撥歷

凡揀撥嘉靖十八年題准通吏例不考其應考揀都吏者每歲春秋二季當堂考試酌取其經考二次不中者即照本等行頭參撥其餘各行酌量原定缺之繁簡分爲急撥大撥二項每歲二季考揀分取二等列一等者充事繁急撥之缺列二等者充事簡大撥之缺或本行人

多缺少仍照舊搭撥供役其寫字粗拙文移不通并老

疾殘廢者照例革退爲民

近例每雙月考棟

凡降撥嘉靖二十七年題准每兩月閏撥吏典除各行正撥其人多缺少情願告降者量爲兼搭每年止許二次

近例每雙月招撥一次若有願守本行者聽如搭撥後丁憂者起

復之日仍照原搭撥缺闈補不許指以做破混補本行以起規避三考滿日俱照二考應撥衙門資格出身敢有營求坐名注撥等項奸弊聽本部開送法司治罪干礙應叅官員一併叅究

凡聽撥挨缺未到願撥南京各衙門及在外各王府各府縣衛所各倉庫當該者俱准每兩月一放其五年一

次疏通凡告撥原籍司府州縣等衙門者俱准如所告
缺或裁革或守候人多仍許起送赴部

凡隨工隨邊當該辦事官吏嘉靖二十一年奏准在外納
銀未經歷事之人不許撥送隨工隨邊再希減免又脫
京考其應免考者止免初考不免臨選覆考 萬曆七
年題准各邊方督撫等衙門書吏及吏兵工三部都吏
令典并錦衣衛令典不許假以軍功効勞等項爲名希
免初覆考中

凡吏農援例嘉靖十一年題准在外吏農援例免其二考
起送到部該辦事者不許重納在京辦事未滿并未撥
當該者必查在外曾應兩考不係援例者方准送納

萬曆七年題准除民間子弟上納農民及知印承差照舊加納外其餘自聽缺一年以上至三考役滿上糧等項事例盡行停止在外通更亦止于令史內考選不許納銀

凡吏典辦事舊例俱以三年爲限成化二十二年奏減半年弘治四年又奏減三箇月十一年又奏減三箇月止辦二年其兩考通更舊例免辦事就撥當該十四年奏准辦事二年若倉攢守支六年鹽課司攢守支八年亦俱免辦事未及六年八年者扣算補辦全無守支者不免其在南京辦事者原無定例弘治十年奏准大小二石辦事半年大小一石并州所司吏辦事一年

凡在京在外三者役滿更典給由赴部查考明白通類引
奏冠帶入選其上糧免考者行戶部該司勘實仍查役
內有無過犯無過照資格出身若犯公私徒杖罪及私
笞減等不盡者俱降級若犯公私笞罪減盡無科者俱
免降級

凡在京辦事吏典原籍災傷告回省災者類題給引定限
回部仍送原投衙門補辦違限半月者送問

凡在京聽撥當該吏典告稱取撥未到者送順天府給引
照回依限回部聽撥若延住三年之上者行查其願告
南京外考者聽

凡江西浙江蘇松更洪武二十六年奏准不許於戶部內

用

凡雲南貴州四川土吏洪武年間不與出身考滿後仍發
原衙門着役 宣德元年奏准土吏考滿到部發本布
政司改調別衙門 成化四年 詔雲南土吏兩考役
滿免送赴部就於本布政司給由照例調用 十五年
奏准革去貴州土吏 弘治三年奏准倉攢未及周歲
及已周歲未及守支丁憂會交盤無礙者起復到部撥
各衙門辦事一年半准作守支月日收考違者仍撥原
倉守支照三年滿日事例收考 又奏准兩考吏到部
有少歷未及三月該撥外衛者免其轉補就於辦事月
日內照數增加准作該補之數三月以上仍撥外衛轉

補 十三年奏准革去四川永寧龍州二宣撫司泥溪平夷蠻夷沐川九姓五長官司并各司所屬驛站巡檢司土吏各添設流吏

考滿事例

太祖洪武十七年議定吏員考滿試中第一第二等者於在京有出身衙門內用第三等者於在京未有出身衙門內用仍以等第姓名出榜曉諭遇缺以次撥用 二十六年奏准各衙門吏三年役滿於本衙門見缺令史書吏內陞用再歷三年給由赴京如有餘吏送赴吏部不許一槩縣陞於州州陞於府府陞於布政司等衙門及王府長史司託故不給由者治罪 三十一年奏

准吏員考滿不給由丁憂不起復及侍親等項託故在閒已經官府問斷仍充吏役者重歷三考

成祖永樂十一年奏准在外吏考滿照官員給由程限赴部若託故遷延者問罪妻子同發北京充軍種田二十年令吏典不給由丁憂不起復得代不赴京不着役者悉發保安衛充軍

宣宗宣德三年奏准吏役滿擇其年五十以下堪用者存留五十以上不堪用者俱罷爲民有赦前在逆能自首者乃令爲民隱而不首事覺發隆慶州爲民七年

勅諭吏員三考滿當授官者吏部通引於內府會同六部都察院翰林院堂上官出題南北類試錦衣衛堂

上監察御史六科給事中監試考其文義粗曉行移得
當書札不謬三事俱可取者爲一等二事可取者爲二
等三事俱不可取者爲民當差

英宗正統元年奏准在外吏役除爲事月日明有文案許
令補轉其患病在家月日不補轉亦准實歷三年考滿
三箇月內遇缺許令陞補三箇月外雖有缺不准陞叅
其六年給由違限者問罪解京重歷給假省親祭祖送
幼子還鄉違限等項送問者俱不重歷 十二年奏准
考滿吏歇役在家過違例限不行給由或丁憂服滿起
復違限或侍親終起復違限或丁憂起復不補原缺叅
補別衙門或託故在閒年久復充吏役或一考多歷一

箇月或給由起送違限雖告有堪信文憑遷延二年之上或給由起復到部將役內年月日期增減及多增五歲以上有規避者或丁憂少守制多守制一箇月或越關在迺行提解京者俱叅問重歷或歷役一考或歷役未滿公差事完已滿一考或歷役一考滿爲事回還或丁憂服滿起復及截替裁革吏本衙門有缺俱許三箇月以裏叅補無缺起送合于府州縣查缺四箇月以裏叅補又無缺起送布政司查缺五箇月以裏叅補其都司衛所吏典無缺起送該管有司查缺依例轉撥兩考給由但違一年之上叅補者叅問重歷或爲事歇役或考滿爲事歇役俱以問結之日爲始應還役者仍補原

役轉歷兩考以滿爲事還役者俱照限給由違者叅問重歷或爲事做工公差等項俱已問結事完工滿之日爲始若遷延一年之上着役者叅問重歷其倉場攢典以守支盡絕之日爲始依例給由違者叅問重歷

景皇帝景泰二年奏准在外吏兩考役滿止以實撥辦事月日爲准丁憂月日亦准實歷數內有省祭送幼子還鄉爲事虛曠月日仍撥補轉 五年奏准有過名吏公文吏冊開報不明者先取親供結狀准收實撥冠帶仍行查勘但有隱匿貪濫等罪例不出身者發隆慶永平等處爲民

英宗天順三年奏准四川福建兩廣等處吏丁憂起復送

幼子等項及年四十五以上曾撥充南京當該者就行撥補及將例前實撥當該三考滿日行南京吏部查理如無充當隸兵及貪濫等項就行考試中者起送赴部奏請定奪不中者就被發回原籍爲民

憲宗成化二年奏准在京各衙門辦事吏典有辦事一年以下者納豆一百石二年以下八十石三年以下六十石免其考試就便實撥當該其辦事一年以下納豆二百石二年以下一百五十石三年以下一百石送吏部免其京考給與冠帶即照資格挨次選用 又奏准在京各衙門當該吏典有着役一年以下納豆八十石二年以下六十石給與冠帶依資格挨次選用 又奏准

在京各衙門辦事官有該正從八品選用者納豆一百石照依資格挨次選用 三年奏准吏員考滿照宣德年間事例會官考選 七年令三考滿吏典從吏部陸續考試不必會官仍照三等例行 二十三年令吏典三年滿考試不中者給與官帶閑住 嘉靖二十三年題准三考援例冠帶吏典止照援例資格冠帶不許再行告考 萬曆九年議准三考役滿吏典有老疾不堪應試者請給冠帶回籍養身 近例吏典考中一等者仍查役內有無過犯無過犯照資格出身若犯公私徒杖罪及私答減等不盡者俱降級若犯公私答罪減盡無科者俱免降級查審明白同二等吏通類引奏冠帶

入選凡在外一考吏滿無缺起送赴部者查無違碍付驗封司撥補兩考

凡吏典給由例限南直隸并各布政司俱十四箇月北直隸者八箇月違者送問

凡吏典一考役滿不轉叅兩考役滿不給由展轉捏故歇役三年之上者就彼問發爲民中間雖有事故亦不准理未及三年者行查雲南吏典不行轉叅給由者同其有接喪丁憂服滿遷延三年之上不起復者亦問發爲民未及三年果有事故實跡查照定奪雖在三年之內起送過限到部者仍送問重歷

凡吏典給由赴部中途被水火盜賊失落原給公文雖告

有所在官司文憑亦待行勘明白方許付撥若將批咨申文手本內緊關年月字樣洗改有跡或給批年遠遇革不倒換新批者俱送問

近例吏典二考給由到部如違限二年半之上暫付行查三年之內給文三年之外到部者行查定奪若起文雖在三年之內到部在四年之外并起文到部俱在三年之外者革役如公文開有爲事耽延招冊明白行查定奪如無事故俱革役 又三考滿後一年之上到部收考行查二年之上行查定奪三年之上革役 又吏典告撥在外衙門准作京考滿日給由赴部查其候缺三年之外方叅者收考行查六年之外者行查定奪九年

外者革役如公文明開守缺人多在官聽補者免查革
若違十年之外雖有前項緣由仍行查定奪十五年以
上者雖有事故亦不准理

凡吏典給由查無本處造到吏冊亦准驗封司暫撥辦事
行勘無碍辦事滿日照例實撥倉場攢典吏同

凡倉場攢典守支八年前役不盡者委官交盤明白交與
見任官攢守支給由其批內不開守支盡絕年月日期
及違限者送問曾經收放糧草者查照守支年分多寡
免其辦事就撥當該全無收放者起送赴部駁回另歷
凡在外轅補三考二考吏役內曾犯笞杖罪名不抄原問
衙門招由繳部者不准收考

凡乞 恩免考嘉靖三十年議准隨邊隨工書吏叙功二
免考省祭者止免官辦亦仍要考試省祭

今上萬曆元年議准邊吏止免初考兵部吏雖初考不許
驟免 七年令今後書吏再不許濫叙邊功希圖免考
九年令各衙門軍功工完等項再叙及書算人等者
着該科叅奏吏典輩役

凡三考役滿更考其法律立爲三等通者爲一等依資格
出身其次爲二等雜職出身不通者爲三等給與冠帶
放回原籍閑住

凡在外鹽運司及遇例納米等項吏典俱送戶部查理鹽
課通關回報方許收考

凡戶兵二部書算九年考滿中一等者依資格出身二等者雜職出身三等冠帶閑住

承差知印事例

太祖洪武二十六年奏准在外承差於能幹人員內選取三年考滿役內無私過雜職內用有私過充吏役

英宗正統元年奏准在外三司承差有缺於民間丁糧相應殷實之家選其才貌可用者縣申州州申府府申布政司覆勘相同方許收叅有私過者充吏役保舉官員坐罪

凡承差役滿到部審實付文選司分撥各衙門辦事知印役滿查明叅充年月日期收考奏請冠帶付文選分撥

辦事但犯笞罪以上俱發充吏考滿不給由丁憂不起復爲事在逃遇赦者仍發重歷若役滿到部違限隱匿過名多歷少歷增減年歲及批咨內洗改緊關字樣俱查問

掾吏顯擢姓名

滕懋德以吏員官兵部尚書

張度以吏員任吏部尚書

胡禎浙江錢塘人 國初御史臺吏洪武十四年任刑

部尚書本年免

徐輝直隸常州武進人由吏員洪武十八年任戶部尚書

樂韶鳳金椒人洪武中由兵書十三年任祭酒

沈顥

顥一作顥

廣東揭陽人洪武中書吏建言 欽授御史

萬祺江西南昌人少遇異人授以祿命書及吏辦銓部
多奇其術拜序班 景皇帝召見言輒驗及 帝不豫
有議召 襄藩者石亨問祺對云 帝在南宮奚事他
求遂刻期復 辟蓋祺一言之助云

王鍾直隸華亭人洪武中吏員元年由刑部郎中陞戶
部右侍郎卒贈 太子太保謚僖敏

李友直直隸清苑人由北平布政司吏員永樂十九年
以行在工部左侍郎署兵部事宣德元年轉刑部尚書
正統三年卒

劉本道江陰人永樂中邑吏天順元年任戶部右侍郎
呂本壽州人故元中書掾吏歷吏部尚書洪武六年改
太常卿七年謫北平僉事

柰亨順天香河人由吏員洪武四年任戶部右侍郎掌
光祿寺

楊時習江西豐城人由吏員永樂二十二年任大理卿
踰數日改交趾按察使

陳寧湖廣茶陵人由府掾洪武元年任吏部侍郎
汪河直隸舒城人由掾吏洪武元年任吏部侍郎

李信山西浮山人洪武中縣掾十五年任吏部尚書
葉春浙江海鹽人永樂初由邑掾宣德六年任刑部右

侍郎本年致仕

黃政直隸陽山人由邑吏洪武十八年擢右僉都御史
以事出英山縣吏及金山寇起召復職轉二十一年
降卒

徐晞直隸江陰人永樂中邑吏正統七年任兵部尚書
十年卒

李質以吏員官工部尚書

王春由吏員天順中官禮部右侍郎掌光祿寺

劉敏由吏員官刑部右侍郎

王詔由吏員官刑部右侍郎

汪懋由吏員官大理寺卿

平思由吏員官陝西左叅政

况鍾由吏員任蘇州知府以政聲加正三品俸

熊尚初由吏員任泉州知府以政聲加正三品俸

賈信由吏員官西安知府以政聲加正三品俸

余節由吏員任都御史中丞

郎本中由吏員任吏部尚書

張苗以承差任南京通政使

太監張敏從子

郝郁直隸撫寧人本府案牘永樂二十二年任光祿卿

吳復正統末以知印由倉官主簿累遷至工部左侍郎

陶冲文亦以知印授倉官後不復由資歷

貲選

宋

寧宗嘉定十年十二月募民納粟補官軍與故也

理宗端平元年詔應奏薦人當紹定六年以後入貲補官者令別換授 淳祐七年詔賞浙東西福建路監司州郡所申官士之家濟糶者凡九人補轉官資有差 景定三年馬光祖奏今歲監補在即江湖閩廣所至糶價未平乞照嘉熙二年例權令各路漕司收試從之

遼道宗大安四年四月立入粟補官法

金

熙宗皇統三年三月陝西旱饑詔許富民入粟補官

世宗大定元年以兵興歲歉下令聽民進納補官又募能

濟饑民者視其人數爲補官格 十月尚書省奏正隆
軍興之際進錢粟者亦宜量授以官詔從之 二年正
月行納粟補官法 五年二月以邊鄙寧息罷納粟補
官令

章宗明昌二年勅山東河北闕食之地納粟補官有差
承安二年復令人入粟補官 五年正月尚書省言內
外軍人入粟補官者多行伍窳虛請俟平定應監差者
與三酬門戶有職事者陞一等其子弟應廕者罷之
泰和六年二月定納粟補官之家存留弓箭制

宣宗貞祐二年三月從知大興府事胥鼎所請定權宜密
恩例諸人許進官陞職丁憂人許應舉求仕監戶許從

良入粟車各有差 三年二月勅尚書省入粟補官者
毋括其戶爲軍又制無問官民有能勸率諸人納物入
官者米百五十石遷官一階正班任使七百石兩階除
諸司千石三階除永簿過此數則請于朝廷定議賞推
司縣官有能勸率進糧二千石遷一階三千石兩階以
濟軍儲又定制司縣官能勸率進糧至五千石以上者
減一資考萬石以上遷一官減二等考二萬石以上遷
一官陞一等皆注見闕 四年河東行省胥鼎言河東
兵多民少倉空歲饑竊見潞州元帥府雖設鬻爵恩例
然條目寡少未盡勸率之術今擬凡補買正班依格止
廕一名若願輸許增廕一名職官願納粟或不願給俸

廩券糧者宜增數進加三舉終場人年五十以上四舉年四十五以上並許入粟該恩大小司及承應人令譯史吏員雖未係班亦許進納遷官其有見官應注諸司者聽納物借注丞簿丞簿注縣令差使免一差掌軍官能自備芻糧者依職官例遷官如舊 興定元年潞州行元帥府事粘割貞言近承奏格凡去歲覃恩之官以品從差第聽其入粟委帥府書空名授之則人無陳訴之勞而官有儲蓄矣比年屢降覃恩凡羈縻軍職者多未暇授若止許遷新覃則將隔越矣乞合計前後所該輸粟積遷詔從之 二年二月諭尚書省曰聞中都納粟官多爲吏部繳駁殊不思方闕之時利害爲何如

哀宗天興元年八月賣官及許賣進士第京城民楊興入
貲授延州刺史劉仲溫入貲授許州刺史

元

世祖至元二十五年遙授松江民曹夢炎浙東宣慰副使
夢炎願歲輸米萬石乞免他徭且求官職桑哥以爲請
故有是命

武宗至大元年江浙湖廣江西河南兩淮屬郡饑訪富家
能以私粟賑貸者量以授官

泰定帝泰定二年以郡縣饑募富民入粟拜官一千五百
石從七品一千石正八品五百石從八品三百石正九
品不願仕者旌其門

文宗天曆三年河南陝西等處民饑省臣議江南陝西河南等處富實之家願納粟補官者驗糧數等第從納粟人運至被災處所隨即出給勘合朱鈔實授茶鹽流官咨申省部除授凡錢穀官隸行省者行省銓注腹裏省者吏部注擬考滿依例陞轉其願折納價鈔者並以中統鈔爲則江南三省每石四十兩陝西省每石八十兩河南并腹裏每石六十兩其實授茶鹽流官如不願仕而襲封父母者聽 陝西省一千五百石之上從七品一千石之上正八品五百石之上從八品三百石之上正九品二百石之上從九品一百石之上上等錢穀官八十石之上中等錢穀官五十石之上下等錢穀官三

十石之上旌表門閭 河南并腹裏三千石之上從七品一千五百石之上正八品一千石之上從八品五百石之上正九品三百石之上從九品二百石之上上等錢穀官一百五十石之上中等錢穀官一百石之上下等錢穀官 江南二省一萬石之上正七品五千石之上從七品三千石之上正八品二千石之上從八品一千石之上正九品五百石之上從九品三百石之上上等錢穀官二百五十石之上中等錢穀官二百石之上下等錢穀官 凡先嘗入粟遇授虛名者今再入粟則依驗糧數照資品令實授茶鹽流官 陝西省一千石之上從七品六百六十石之上正八品三百三十石之

上從八品二百石之上正九品一百三十石之上從九
品 河南并腹裏一千三百石之上從七品一千石之
上正八品六百六十石之上從八品三百三十石之上
正九品一百石之上從九品 江南三省六千六百六
十石之上正七品三千三百三十石之上從七品二千
石之上正八品一千三百三十石之上從八品六百六
十石之上正九品三百三十石之上從九品 先嘗入
粟實授茶鹽流官今再入粟則依驗所入糧數加等陞
職

順帝至正四年十月令民入粟補官以備賑濟有匿奸事
而輸粟得七品雜流者爲怨家所告有司議輸粟例無

有過不與之文中書省司郎中成遵以爲賣官鬻爵已
非令典况又賣與奸淫之人其何以爲治必奪其敕還
其粟著爲令乃可從之 乙未春中書省臣進奏遣兵
部員外郎劉謙來江南募民補路府州司縣官自五品
至九品入粟有差非舊例之職專茶鹽務場者比雖功
名逼人無有願之者旣而抵松江時知府崔思誠惟知
曲承使命不問民間有粟與否乃拘集屬縣巨室點科
十二名衆皆號泣告訴曾弗之顧輒施考掠抑使承伏
即填空名告身授之平江路達魯花赤不避譴斥力爭
以爲不可竟無一人應募者崔聞之深自悔赧 十二
年中書省臣請行納粟補官之令凡各處士庶果能爲

國宣力自備糧米供給軍儲者照依定擬地方即授常選流官依例陞轉封廕及已除茶鹽錢穀官者能再備錢糧供給軍儲者驗見授品級改授常流從之

按草木子曰天下治平之時臺省要官皆北人爲之漢人南人萬中無一二其得爲者不過州縣卑秩蓋亦僅有而絕無者也後有納粟獲功二途富者徃徃以此求進令之初行尚猶與之及後求之者衆亦絕不與又獲功之官於法非得風憲體覆牒文不輒命官憲使招權非得數千緡不與行遣故有功無錢者徃徃事從中輟皆抱怨望其後盜塞寰區空名宣敕遇微功即填給人已不榮之矣方國珍之初亂也有宣數道敕十數道縣

以購人立功及有功亦竟不與

皇明

國朝工部尚書嚴震直禮部尚書鄭沂以稅戶人才起通政使樂暉以輸粟起

景皇帝景泰元年以邊圉事殷令天下生員納粟上馬者許入監其上選事例與歲貢同自後納粟入監此其肇端云

按我朝納粟入監事例濫觴於此其源一開末流不可復塞後來遂援此例以賑饑甚至援此以接濟大工無止息之期矣自正統以來承平日久天下之事無不日入於玩愒而太學爲尤甚祖宗朝最重太學慎選

貢徒文行兼備者積分自廣業堂升至率性堂即得銓選京職方面與進士等故洪熙初猶選監生吳信等爲給事中厥後其法寢廢迨至納粟上馬例行與舉貢皆以例挨次撥歷聽選無復教養之實 祖宗良法美意其尚存而不至於漸盡者幾何閱歷世變何可勝慨

或曰洪武中嘗取稅戶人才用之納粟入監非即其遺意耶得失何以異曰 聖祖之意以貧而仕者常貪故選才於閭左蓋取洪範正人旣富方穀之義而非有所利之也然謂之選則必擇其闔族之賢而後舉之非槩用之而無別也此我 聖祖獨出千古之見致治之良法也至後來納粟入監之例乃利其財而授官以誘之

不顧賢否而任其剝下以償之矣故稅戶人才之用乃
聖主立賢之無方納粟入監之例乃季世苟且之敝
政得失何啻天淵欲致天下之治必法祖而後可

憲宗成化二年三月禮部尚書姚夔奏南京兵部尚書李
賓等奉勅賑濟南京流民衆議欲令官員軍民子弟
納粟送監讀書切惟國子監乃育才之地朝廷資以
致治近因各處起送四十歲并納草納馬生員動以萬
計已不勝其濫今又行此將使天下以貨爲賢士風日
趨于陋尚望其有資於治理哉宜別爲處置上曰
祖宗設太學教育人才非由科貢者不得濫送今賓等
欲令官民子弟出錢穀賑民補太學生古無此例且天

下財賦所出其途孔多學校豈出錢穀之所禮部議是其勿許二十一年三月禮部議覆南京吏部等衙門應詔陳言內一事欲將各處納銀米監生分送南北二監自願具薪米坐監者聽其年十三四或十五六七則俱行各處提學官收入該學肄業滿十年仍復監從之

孝宗弘治五年十一月停止生員吏典上納事例王恕等奏訪得永樂宣德正統年間天下亦有災傷各邊亦有軍馬當時未聞有納糧納銀爲監生吏典等項事例糧草不聞不足軍民不聞困弊近年以來各邊并腹裏少有災傷所在守土等官輒便奏開生員吏典納粟等項

事例遂爲長策自有此例雜進者日多一日以致正途監生吏典因而壅滯不得出身候選多至十五六年以上纔得一官年已向衰誰肯盡心職業又况前項納粟人等旣以財進身豈能以廉律已欲他日不貪財害民何由而得本部已於弘治元年三月具題停止續該山東巡撫王睿南畿巡撫侶鍾各明知本部題准停止再不許奏開前項納銀事例乃敢故違戶部亦不查照輒便朦朧覆奏准行是使後來雜進人數愈多選法愈滯况其所得銀物不若一貴族所積濟人不多壞事實大所宜通行就便停止今後各處災傷任從巡撫等官多方區畫再有奏開前項納銀事例聽從本部并科道官

糾劾治罪從之

按生員吏典納銀事例弘治以前猶暫行復止人數有限今則無限數無止息之期矣向猶爲接濟軍旅饑荒之用出於不得已今則爲接濟土木之功矣向猶以爲不美之政 廷臣屢經議革今則循習視爲當然爲常事爲不可已之規不可無之舉而無復有訾議之者矣

世宗嘉靖四十三年正月戶部尚書高耀奏薊鎮缺乏糧餉數多乞開兌運事例請于歲貢援例等監生預授在外布按二司經歷等官經歷五百兩至檢校一百二十兩各有差其官員出身從七品一百六十兩至從九品六十兩各有差從之及是年四月兌運例行 上諭戶

部臣曰這開納事例姑准行你每還宜講求足 國裕
邊之計毋專恃此以爲長策又曰這各項錢糧着撫按
官嚴督有司依期徵解俟財用稍充例止 是年春二
月吏部尚書嚴訥奏校推廣事例納銀省祭部善等州
吏目四月授納銀監生吳格等儒士戈言等及監生王
定鄭守等俱冠帶八月授納銀監生馮時雨等外衛經
歷九月授納銀監生唐斌等冠帶 丙寅秋九月吏部
尚書胡松奏推廣事例納銀醫生楊柳汪文翰等遙授
太醫院吏目監生徐懋德遙授光祿寺監事等官
穆宗隆慶元年二月吏部奏行開納事例納銀省祭周談
等遙授經歷等官

按貲算入官昉於西漢謂任富可不貪也厥後邊費不足輸選成俗雖張釋之黃霸卜式司馬相如咸由是出不以爲諱然終西漢之世得人四五而已唐宋以來亦間行之大抵由軍興頓匱非獲已也我朝宣德以前科貢之送入太學者猶須精擇戒其庸濫至于景泰始以狄人內犯邊境多虞開生員納粟納馬入監之例然是時多不過八九百人已而吏部尚書王直禮部郎中章綸咸以爲言禮部侍郎姚夔議覆遂尼不行成化初復開納糧納草納馬之例未久而止二十年山西陝西大饑民相食大臣以救荒無善策不得已又開納粟入監限年餘即止時入監者已至六七千人於是令入監

者過兩月則放依親有願自備薪米寄監讀書者聽尋
又令納粟監生年二十四以下願坐監者自備薪米寄
監讀書扣年二十五歲以上方准食糧收撥二十二年
令納米銀監生到監兩月放回原籍收充增廣生員年
二十以下者八年二十以上者五年滿日行取入監坐
班序撥弘治十年有直隸民生赴山西納粟冒年違例
入監已經撥歷巡按御史查出治罪奏充增廣生員五
年已滿復監肄業正德四年爲預備邊儲令納銀監生
年二十五以上發監肄業二十五以下送監寄名放回
依親扣年二十五歲以上起送復班五年令納銀監生
照前例自備薪米寄監讀書有自比監告入南監者南

京禮部查食糧年月仍照二十四歲以下事例寄監放回原籍讀書扣年二十五歲以上復班十二年以後或以賑濟或以防禦或以傳奉開上粟入監之例於是納銀之途益廣矣十六年 世宗入繼大統 詔嚴止之嘉靖四年又復暫開然須提學官考其能通文義者兩京十三省限不過五千人時有各 王府典膳引禮等官青衿社學生亦皆得援例入監十五年禮部議以依親給假援例生員限三月以裏起送前來送監肄業如有過違照例送問其私自逃監者許該監查報本部轉行法司提問依律例治罪奉 旨納銀例貢逃監三月以外發回原籍肄業近年太僕缺馬戶部缺邊費乃開

例益濫遂至市井恒人皆得借俊秀名目輸粟入監者
注選銓部者至數萬人歷考 先朝雖不獲已而行此
例然必各提學官試其文理通者而後許之又各地方
俱限以名數又年二十五以下者雖寄監不得食糧收
撥近時此例俱未申明是以總州市童得升太學侗頑
俗子亦齒諸生其間英俊由此而擢名科第表樹勲猷
夫豈無人然千百而什一耳雖然漢唐以來官輒以貲
授其不才者且若之何今 國家雖入其貲猶必教之
學而後使之仕視徃代之法爲愈矣職師儒者惟當仰
體 朝廷曲成之意未可漫以貲途畧之也

國子監管祭酒事禮部右侍郎謝鐸等題爲塞捷徑以

清國學事臣竊惟國學聚天下英才而教育之皆所以
備國家他日之任使也選之科貢猶恐未精柰何近
年以來大開捷徑如納馬納粟之徒皆謂其有資國
用之缺殊不知得其利者未什一而受其害者已千百
况今日之納馬納粟即他日之鬻爵賣官此等風聲豈
盛世所宜有哉今邊事方殷謀國之臣必有以此
策處者萬一再行則義倫之堂永爲交易之地豈不大
可恥哉臣願深鑒前弊預塞其途雖或國用不足亦
當別爲節縮區處而此策斷不可行也

祭酒呂柟嘗議援例監生依親回籍者行各提學官歲
考之時與同本處生員一體考試量行賞罰奏不果行

考成化中雖舉人回籍依親者提學分巡官猶得提督
考校使之勿惰今援例者旣無績學之素入監不一二
年即出焉可遽無造就之法令驕怠以棄其身乎

按 國初祇以徵聘薦舉賢良孝廉明經儒士入官已
而開歲貢之例重舉人進士之選而以貲發身所未覩
也雖 洪武中有稅戶人才之擢然止取其富厚純朴
而非計其貲也景泰中始以邊費令民納粟納馬而貲
選益權輿矣繼是而納級又繼是而它運而此道益濫
觴焉然嘉隆以來輸粟子弟往往掇取巍科是又可以
貲選少之哉

貲選登巍科姓名

任亨泰

人洪武二十一年以監生擢

廷對第一

許觀

人洪武二十四年以監生中會試

殿試俱

第一

羅玘南城人成化丙午以監生中順天鄉試第一

周光宙

人正德丙子以監生中順天鄉試第一

馬一龍溧陽人嘉靖戊子以監生中順天鄉試第一

馬從謙

人嘉靖辛卯以監生中順天鄉試第一

沈紹慶崑山人嘉靖癸卯以監生中順天鄉試第一

曹大章金壇人嘉靖癸丑以監生中會元 廷試第二

范應期烏程人嘉靖乙丑以監生中

廷試第一

莊允中華亭人嘉靖丁卯以監生中順天鄉試第一

高洪謨上海人萬曆壬午以監生中順天鄉試第一

唐文獻華亭人萬曆丙戌以監生中廷試第一

王衡太倉人萬曆戊子以監生中鄉試第一

辛丑會試第二 廷試第二

徐光啓上海人萬曆丁酉以監生中順天鄉試第一

已上皆以輸粟登高科者其餘不能盡載

方伎

宋理宗時金真人治錢塘江湖有驗賜三品道官及粟帛皆不受

遼太宗時直魯古以善醫給侍左右

景宗保寧時王白以善卜筮歷官彰武興國二軍節度使

聖宗統和初耶律敵魯以精醫爲韓德讓所薦官至節度使

道宗清寧中耶律裏履善寫真官至太子太師

金哀宗時武禎善占天文爲完顏仲德所薦官司天長行元

世祖時田忠良精陰陽用劉秉忠薦見上指西序第一人問曰彼手中握何物對曰鷄卵果然又問朕有何事縈心曰當有一名僧病耳上曰然是國師也遂令司天試星曆遁甲諸書皆通詔官之司天上嘗問江南何時平對曰在酉年至元十一年七月十五日夜白氣貫三台上問何祥對曰三公其死乎未幾太保劉秉忠果

平一日出獵上駐輦問曰朕有所遺知是何物還可復
得否忠良對曰失數珠明日二十里外當有得而獻者
已而果如言海都叛遣皇子那木罕丞相安童征之忠
良奏不吉上不悅昔里吉果劫王子丞相入海都忠良
曰王子末年當還其後果驗 至元十六年詔求藝術
之士遣牙納术崔或徃江南訪求 十八年詔舉醫卜
筮通天文曆數之士 二十四年弘州匠官以犬兔毛
製如西錦者以獻詔匠官知弘州 二十五年詔毋遷
轉工匠官 二十七年括天下陰陽戶仍立各路教官
精于藝者歲貢各一人

成宗大德十一年通授教坊司官沙的爲平章事

胡粹中曰平章政事經國大臣之任也始則馬謀沙以角觝屢勝得居其位及沙的等以教坊伶官遙授是職元之名爵謬濫至此若監察御史朝廷耳目所以肅清庶政而以任秦虎人徹兒怯思丞相天子股肱所以表正百僚而以授臣李邦寧翰林承旨斯文宗主而以授西僧瓦教班武帝用人如是其爲政不言可知也

武宗至大元年詔諸內侍太醫陰陽樂人毋授常選散官順帝至正六年秋七月時有以音樂得幸者帝命爲崇文監丞參政朶兒直班他擬一人以進帝怒曰選法盡由中書耶朶兒直班頓首曰用幸人居清選恐後世議陛下今選他人臣實有罪帝悅

皇明

國朝文臣入仕正途惟有進士鄉科歲貢選貢而賢良方正人材舉薦亦次之其有不由是途而登大位者倣貴與例入方伎目而一二上書執役守城歸化者附焉

周淵浙江壽州人洪武中以能書舉任大理右寺丞方繼先直隸宜興人老人洪武二十三年任御史

周或陝西朝邑人洪武中由上書錄用任通政使

竇守真大名府元城人老人洪武二十三年任御史

凌晏如浙江歸安人以楷書薦入授中書舍人宣德二年任右僉都御史本年丁憂五年起原職理院事九年殷宗直隸華亭人老人洪武二十三年任御史

丁鉉直隸南陵人舉楷書正統中任刑部侍郎

顧中浙江烏程人老人洪武二十三年任御史

金問直隸吳縣人永樂中以楷書薦九年任南禮侍郎

楊鑑直隸濠縣人老人洪武二十三年任御史

沈度直隸華亭人以能書舉宣德元年任學士九年卒

度弟粲亦以能書官大理寺少卿

趙榮閩縣人陝西通渭籍舉楷書生員景泰中任工書

陳繼善直隸丹徒人老人洪武二十三年任御史

袁復寶應人洪武中以能書舉建文四年任大理少卿

徐成五直隸吳縣人老人洪武二十三年任御史

張天駿華亭人宣德中以能書官禮部尚書

周惠疇由儒士正德中官工部尚書管工作

張電上海人嘉靖中以能書官禮部左侍郎

談相嘉興人嘉靖中以能書官工部右侍郎

王槐以能書官工部右侍郎

程南雲以習字生官太常少卿

陳學浙江金華人正統初舉楷書天順中任鴻臚卿

陳道瀛直隸涑水人樂舞生嘉靖十七年陞任工部尚

書

徐可成順天東安人樂舞生嘉靖二十六年任工部尚

書掌太常寺事

吳訥直隸常熟人舉醫生宣德五年任南左副都御史

正統五年致仕

太子少師贈少師榮國公姚廣孝左布政使吳印華克勤俱以僧翰林應奉李願證輩亦然

禮部尚書蔣守約李希安崔志端工部尚書陳道瀛徐可成禮部左侍郎丁永中金贊仁師宗記俱以太常神樂觀道士然不繇太常寺

太子太保禮部尚書贈少保許紳禮部左侍郎蔣宗武通政司通政使掌太醫院事施欽仲蘭李宗周張鑾徐偉嘉靖中任俱醫士

兵部尚書贈少師金忠浙江鄞縣人建文永樂二朝任由善卜

太常寺丞贈少卿袁珙子尚寶司少卿忠徹由善相
太常寺卿丘玄清均州人洪武中以全真道人薦賢良
嘗爲監察御史至太常卿以二宮人賜之不受

鴻臚寺序班趙九成鄞庠黜生弘治中以善棋授官
禮部左侍郎湯序右侍郎康永韶由天文生

禮部尚書邵元節少師少保尚書陶文仲禮部左
侍郎掌通政司事李孜省太常寺卿鄧常恩趙王芝凌
中俱以方術得幸

太子少保工部尚書萬祺由推命

太常卿顧雅以巫師進

兵部尚書單安仁左布政使張真等俱以武弁遷

工部尚書徐杲以木工廕一子至錦衣衛指揮一子管繕所正及官生 賜玉帶食正一品俸隆慶元年下獄戍邊 又工部左侍郎蒯義右侍郎蒯綱蔡信郭文英俱由木工

工部左侍郎陸祥由石工

禮部左侍郎李嘉係奉祠所禮生

禮部左侍郎張俊以諳書寫入薦

太常寺卿杜安道洪尚觀俱由櫛工見用

光祿寺卿徐興祖井泉俱厨役累陞

布政使蔡春王興宗俱以皂隸出身

太子太保左都御史楊善太子賓客戶部尚書劉中敷

太僕寺卿崔文奎俱守城諸生

刑部尚書安童工部侍郎也先帖木兒忽哥赤治書侍
御史瑣納兒加右副都御史咬住四川左叅政閻乃馬
友俱畚虜歸順

按察副使裴叔耆潘季佑太僕寺卿趙煜以安南國歸
順人季佑僞太保也後以叅政掌乂安府事

工部尚書黎澄子侍郎叔林以神鎗澄即僞虞太皇黎
蒼弟在本國官爲推誠守正翊賛弘化功臣雲屯鎮蕪
歸化等鎮諸軍節度大使姚江管内觀察處置等使雲
屯歸化嘉興等鎮諸軍事領東路天長等路大都督特
進開府儀同三司入內檢校左相國平章軍國事上柱

國賜紫金魚袋衛國大王澄幸免於僇而以善造神鎗
父子至八座祿食者近五十年年八十餘子亦近八十
可謂遇矣

續文獻通考卷之五十終